

իմ . եւ թէ կցեոցի լեզու իմ ի քիմս իմ , թէ ոչ ⁴⁰
 յիշեցից զքեզ , սկիզբն ուրախութեան իմոյ :
 Ով սուրբ Երուսաղէմ , որ ամենայն ազգաց
 գովիս եւ ամենայն լեզվէ երանիս . ով սուրբ
 Երուսաղէմ , զքեզ եւ ամենայն անհաւատք գի-
 ւան եւ հեթանոսք անվանէ կոչեն . Հրեայք ըզ- ⁴⁵
 ձիւ խնդրեն զքեզ եւ Տաճիկք փափաղանօք առ
 քեզ զիմեն , թէպէտ Մեքէն զնան եւ թէ Մա-
 տինան եւ առ քեզ չմտնան , խութսուզ հաճի
 կոչին : Արդ ով ոք ոչ գիտաց զքեզ կամ ոչ
 լուաւ զքո փառաւորեալ անունդ . ուսեալ են ⁵⁰
 եւ մանկունք , գիտեն եւ կոյս աղջկունք . եւ
 չկայ ոք յարարածս որ ոչ գիտաց զանուն քո
 սուրբ : Զի ամենայն ոք որ կամի ծառայել Աս-
 տուծոյ , նախ առ քեզ գայ , նախ զքեզ կար-
 դայ , թէպէտ եւ անհաւատք որ զքո Տէրն ոչ ⁵⁵
 ծանեան եւ զչինօղն քո ոչ իմացան , այլ զքեզ
 առ հասարակ գիտացին եւ մեծապէս փառա-
 ւորեցին եւ պատվեցին հանդերձ Սիոնիւ : Ու-
 րախ լեր սուրբ Երուսաղէմ , քաղաք Աստուծոյ
 կենդանոյ . քանզի ի քեզ հաճեցաւ Աստուած ⁶⁰
 կատարել զամենայն տնօրէնութիւնս , ի քեզ
 ընակեցաւ , ծնաւ , խաչեցաւ , յարեաւ եւ համ-
 բարձաւ , ի քեզ ընտրեաց զառաքեալս , եւ ի
 քեզ արար զամենայն սքանչելիս . առ քեզ է եւ
 այժմ կենսաբուլս սուրբ Գերեզման , ի քեզ է ⁶⁵
 խաչն աստուածընկալ , ի քէն ոչ ասաց մեկնիլ
 առաքելոցն , առ քեզ է սուրբ վերնատունն ,
 ուր սուրբ Հոգին էջ : Եւ համառօտ ասացից ,

45 Հրեայք յզձիւ : — 48 եւ (առ քեզ) չիք :